

## Allaqqaaq

Upalungaarsimanissaq pillugu inatsisip Kalaallit Nunaanni atuutilersinneqarnissaanut peqqussut

UAGUT MARGRETHE AAPPAAT, Guutip saammaanneragut Danmarkip Dronningia, nalunaarpugut:

Upalungaarsimanissaq pillugu inatsimmi, inatsimmi nr. 1054, 23. december 1992-imeersumi § 82<sup>1</sup>, inatsimmi nr. 514, 26. maj 2014-imeersumi allanngortinneqartumi, § 3<sup>2</sup> upalungaarsimanermut inatsisip allanngortinneqarnera pillugu inatsit nr. 1335, 19. december 2008-meersoq (Umiarsuarni imartaniittuni ikuallattoormi qatserinissaq siunertaralugu ikuallattoqarnissaanut upalungaarsimatitsinermik pilersitsineq, nalilersuinnermut institutimik pilersitsineq il. il.), § 3<sup>3</sup> upalungaarsimanermut inatsisip allanngortinneqarnera pillugu inatsit nr. 514, 26. maj 2014-imeersoq (Naalagaaffimmi oqartussaasut pilersaarusiornissamut pisussaaffeqarnerannik erseqqissaaneq, inuusuttut qatserisartunut ilaasut ilinniartitaanerat pillugu maleruagassanik aalajangersaanissamut piginnaatitsissuteqarneq tamatumunngalu tapiissuteqartarneq, naliliisarfiup il.il. atorunnaarsinneqarnerat) aamma upalungaarsimanermut inatsisip allanngortinneqarnera pillugu inatsimmi nr. 1720, 27. december 2016-imeersumi § 3<sup>4</sup> (Atomip nukinganit atortussianut aamma atomip nukinganit ingerlatsivinnut isumannaallisaanikkut iliuusissat) naapertorlugit aalajangerneqarpoq, inatsit imatut oqaasertaqartillugu Kalaallit Nunaanni atuutilersinneqassasoq:

**§§ 1-23 a.** (Kalaallit Nunaannut atuutsinneqalinngillat)

**§ 24.** Annertunerusunik ajutoortoqartillugu aamma ajunaarnersuaqartillugu, inuiaqatigiit suliassaasa attatiinnarneqarnissaannut ingerlateqqinneqarnissaannullu, ministerit ataasiakkaat tamarmik immikkut Kalaallit Nunaanni susassa qarfirminni pilersaarusiussapput, ilanngullugu upalungaarsimanermut pilersaarutitik suliaqassallutik.

*Imm. 2.* Ineriartornerup tamanna pisariaqartilersimappagu, pilersaarutit iluarsivigineqartassapput, minnerpaamilli ukiut sisamat ingerlaneranni ataasiarluni.

*Imm. 3.* Pilersaarutit aamma taakkununga iluarsisutit Upalungaarsimanissaq pillugu Aqutsisoqarfirmut nassiunneqartassapput.

**§ 25.** (Kalaallit Nunaannut atuutsinneqalinngillat)

§ 26. Illersornissamut ministerip Kalaallit Nunaanni upalungaarsimanissamut pilersaarusiornissaq ataqatigiissassavaa, tak. § 24, oqartussaasunullu siunnersuisuusassalluni.

*Imm. 2.* Pilersaarutit § 24-mi taaneqartut suliarinissaannut Illersornissamut ministeri najoqqutassatut maleruagassiussaaq.

§§ 27-37. (Kalaallit Nunaannut atuutsinneqalinngillat)

§ 37 a. Atomip nukinganit atortussianik, eqqissisimasunut siunertaqartumik atorneqartussanik, atuisoq, uninngasuuteqartoq imaluunniit assartuussisoq, tillinniarqartoqannginnissaanut imaluunniit allatut atortussianik pisussaataitanani pissarsiniarqoqarnissaanut, isumannaallisaanikkut iliuusissanik aalajangersaassaaq.

*Imm. 2.* Atomip nukinganit atortussianik, eqqissisimasunut siunertaqartumik atorneqartussanik, atuisoq, uninngasuuteqartoq imaluunniit assartuussisoq, aammalu atomip nukinganit ingerlatsivimmik ingerlatsisoq, atortussiat aamma innaallagissiorfiup aserorterneqannginnissaannut illersuinissamut, isumannaallisaanikkut iliuusissanik aalajangersaassaaq.

§ 37 b. Atomip nukinganit atortussiassanut aamma atomip nukinganit ingerlatsivinnut isumannaallisaanikkut iliuusissat, takuuk § 37 a aamma § 37 c, imm. 2, isumannaallisaanermut pilersaarummi allassimassapput, taannalu atuinissaq, uninngasuuteqarnissaq imaluunniit assartuussinissaq sioqqullugu aammalu atomip nukinganit ingerlatsiviup ingerlanneqalernissaa sioqqullugu Upalungaarsimaneq pillugu aqutsisoqarfimmut nassiunneqassaaq akuersissuteqarfigineqassallunilu. Upalungaarsimaneq pillugu aqutsisoqarfiup akuersissuteqarnera atugassarititaasut erseqqinnerusumik allassimasut tunngavigalugit aammalu piffissamut piffissatigut killilerneqartumut, akuersissuteqarfigineqarsinnaavoq.

*Imm. 2.* Pissutsit isumannaallisaanermut pilersaarutip akuersissuteqarfigineqarneranut tunngaviusimasut, tamatuma kingorna annertuumik allanngorpata, isumannaallisaanermut pilersaarut iluarsisaq Upalungaarsimaneq pillugu aqutsisoqarfimmit akuerineqassaaq.

*Imm. 3.* Atomip nukinganit atortussianik atuisoq, uninngasuuteqartoq imaluunniit assartuussisoq, imaluunniit atomip nukinganit ingerlatsivimmik ingerlatsisoq, piffissamut killiliussap erseqqinnerusumik allassimasup iluani isumannaallisaanermut pilersaarummik iluarsisamik akuersissuteqarfigineqartussanngorlugi nassiussisimanngitsoq aammalu akuersinissamik angusaqarsimanngitsoq, isumannaallisaanermut pilersaarutip akuerineqarnera atorunnaartoq, Upalungaarsimaneq pillugu aqutsisoqarfik aalajangersinnaavoq.

§ 37 c. Upalungaarsimaneq pillugu aqutsisoqarfiup §§ 37 a aamma 37 b, kiisalu maleruagassat imm. 2 naapertorlugi aalajangersarneqartut malillugit pisussaaffiit naammassineqarnissaat nakkutigissavaa.

*Imm. 2.* Upalungaarsimaneq pillugu aqutsisoqarfik atomip nukinganit atortussianut aamma atomip nukinganit ingerlatsivinnut isumannaallisaanikkut iliuusissat pillugit maleruagassanik erseqqinnerusunik aalajangersaassaat, takuuk § 37 a, aamma isumannaallisaanermut pilersaarutit pillugit, takuuk § 37 b.

§§ 38-69 a. (Kalaallit Nunaannut atuutsinneqalinngillat)

**§ 70.** *Imm. 1-3* (Kalaallit Nunaannut atuutsinneqalinngillat)

*Imm. 4.* Illersornissamut ministereqarfiup, najoqqutassiani aalajangersakkt unioqqutinneqarnerannut imaluunniit peqqusissuteqarnerit imaluunniit taakkunani inerteqquteqarnerit malinneqannginneranni, akileeqqusissuteqarluni, qaammatit 4-t tikillugit paarnaarussilluni imaluunniit pisuni annertusisani ukiut 2-it tikillugit paarnaarussilluni, pineqaatissiissutissat, inatsit manna naapertorlugu najoqqutassiani aalajangersarsinnaavai.

*Imm. 5.* Maleruagassani § 37 c, imm. 2 naapertorlugu aalajangersarneqartuni, maleruagassani aalajangersakkt unioqqutinneqarnerannut akileeqqusissuteqarluni pineqaatissiisarneq aalajangersaavigineqarsinnaavoq, ilanngullugu aalajangersakkt unioqqutinniarsarineqarnerannut pineqaatissiissutissat pillugit.

*Imm. 6.* Ingerlatseqatigiiffiit il.il. (inatsisit malillugit pisussaatitaasut) pinerluttulerinermut inatsimmi kapitali 5-imi maleruagassat malillugit pineqaatissiissummut akisussaasuutinneqarsinnaapput. Naalagaaffik, Namminersorlutik Oqartussat, kommuni imaluunniit kommunit ataatsimoorfigisaat unioqqutinneqarsimappat, Naalagaaffik, Namminersorlutik Oqartussat, kommuni imaluunniit kommunit ataatsimoorfigisaat akiliisussannortitaasinnaavoq.

**§§ 71-78.** (Kalaallit Nunaannut atuutsinneqalinngillat)

**§ 79.** Peqqussut atuutilersinneqassaaq ulloq [**Ullua ikkuguk**].

*Imm. 2.* Inuiaqatigiinni upalungaarsimaneq pillugu inatsit nr. 342, 23. december 1959-imeersoq, Kalaallit Nunaannut peqqussutikkut nr. 405, 20. december 1962-imeersumi atuutsinneqalersoq, atorunnaarsinneqarpoq.

*Imm. 3.* Isumannaallisaanermut pilersaarutinut akuersissuteqarneq, Upalungaarsimaneq pillugu aqutsisoqarfiup peqqussutip atuutilernissaa sioqqullugu atomip nukinganit atortussianik atuisunut, uninngasuuteqartunut imaluunniit assartuussisartunut, aammalu atomip nukinganit ingerlatsivimmik ingerlatsisunut, nalunaarutigisimasai ulloq 1. juni 2017 tikillugu atuutiinnassapput, tamatuma kingorna isumannaallisaanermut pilersaarutinik § 37 b, imm. 1 malillugu akuersissuteqarfigineqartunik, peqalissalluni.

*Uani tunniunneqarpoq xx, ulloq yy*

Kunngiussutsitsinnik Atsiorpugut Naqissusiillutalu

MAGRETHER.

/ Claus Hjort Frederiksen

---

<sup>1</sup> Aalajangersagaq imatut oqaasertaqarpoq: »Inatsit Savalimmiunut aamma Kalaallit Nunaannut atuutinngilaq, kisianni Kalaallit Nunaanni pissutsit atuuttut allannguutigitinneqarlutik, kunngip peqqussutaatigut tamakkiisumik ilaannaasumilluunniit Kalaallit Nunaannut atuutsinneqalersinnaalluni.«

<sup>2</sup> Aalajangersagaq imatut oqaasertaqarpoq: »Inatsit Savalimmiunut aamma Kalaallit Nunaannut atuutinngilaq, kisianni Kalaallit Nunaanni pissutsit atuuttut allannguutigitinneqarlutik, kunngip peqqussutaatigut Kalaallit Nunaannut atuutsinneqalersinnaalluni.«

<sup>3</sup> Aalajangersagaq imatut oqaasertaqarpoq: »Inatsit Kalaallit Nunaannut atuutinngilaq, kisianni Kalaallit Nunaanni pissutsit atuuttut allannguutigitinneqarlutik, kunngip peqqussutaatigut tamakkiisumik ilaannaasumilluunniit Kalaallit Nunaannut atuutsinneqalersinnaalluni.«

<sup>4</sup> Aalajangersagaq imatut oqaasertaqarpoq: »Inatsit Savalimmiunut aamma Kalaallit Nunaannut atuutinngilaq, kisianni Savalimmiuni aamma Kalaallit Nunaanni pissutsit atuuttut allannguutigitinneqarlutik, kunngip peqqussutaatigut tamakkiisumik ilaannaasumilluunniit Savalimmiuni aamma Kalaallit Nunaannut atuutsinneqalersinnaalluni.«